

白樂天文集卷之三十六

浙東觀察使元稹徵之纂集

太保武定侯鳳陽郭勳重編

年譜

公名居易字樂天白氏系出白起為秦將死杜郵始皇思其功封其子於太原故子孫世為太原人二十三世孫邕為後魏太原太守邕五世孫建北齊五兵尚書賜田於韓城因家焉始移籍同州建生士通唐利州都督生志善尚衣奉御生溫檢校都官郎中徙

華州下邽遂為下邽人生鎰鞏縣令生季康襄州別  
駕公皇考也見舊史傳新史宰相世系表及公所述  
鞏縣府君事狀其不同者表稱虞公族百里奚勝秦  
穆姬生孟明視視生二子曰西乞術白乙丙其後以  
為氏而事狀稱楚太子建之子勝號白公其子奔秦  
代為秦將白乙以降是也如表言則白出姬姓如狀  
言則出芊姓按左氏傳晉敗秦于殽獲百里孟明視  
西乞術白乙丙孟明氏百里謂為奚之子可也術丙  
與孟明號為三帥烏知其為孟明之子邪且萬無父  
子三人並將之理此其為說固已踈矣若事狀則又  
合白乙白勝為一族白乙為秦穆將去白勝幾二百  
年而云白乙以降則反以為白勝之後裔又何其考  
之不詳也元和姓纂載風俗通以白乙為嬴姓蓋亦  
以其為秦人意之爾姓纂復泛舉秦白起楚白勝周  
白圭漢白生等數人而皆不能言其自出太抵世祀  
綿藐譜謀敵亡惟當用春秋見聞傳聞之義斷自近  
始若必遠推古昔附會本支則固不能亡抵梧矣  
代宗太曆七年壬子

正月二十日公始生於鄭州新鄭縣東郭宅見公自為墓誌新鄭公祖鞏縣府君所居也抗蘇集本皆作六年歲在辛亥而公嘗有詩云何事同生壬子歲老於崔相及劉郎謂崔群劉禹錫皆同庚則非辛亥明矣集本誤矣生六七月乳母抱立屏下指之無二字百試不差見公與元九書

八年癸丑

是歲鞏縣府君卒於新鄭

九年甲寅

十年乙卯

十一年丙辰

十二年丁巳

與元九書云年五六歲便學為詩

十三年戊午

十四年己未

德宗建中元年庚申

與元九書云年九歲始識聲韻

二年辛酉

三年壬戌

四年癸亥

興元元年甲子

貞元元年乙丑

二年丙寅

公年十五有江南送北客寄徐州兄弟詩自此始  
有文見於集公父襄州府君建中初令宣城東平  
叛命與李洧謀以徐州歸國就擢本州別駕至是  
猶在徐公時遊江南故以詩寄兄弟也然公未仕

以前家常在徐州以府君嘗有功於徐故耶集中  
又有宿桐廬館詩避難越中江樓望歸詩除夜寄  
弟妹詩大抵皆南遊所作但莫能考其歲月爾蓋  
公自少常往來江南侍其兄官浮梁遂以宣州解  
及第既第復至宣城集中是以多江南詩也

三年丁卯

與元九書云年十五六始知有進士舊史云年十  
五六時袖詩謁顧况况迎門禮謁曰吾謂斯文遂  
絕今復得子矣撫言云况謔公曰長安物貴居大

不易及讀原上草詩野火燒不盡春風吹又生乃  
曰有句如此居亦何難

四年戊辰

有王昭君二絕所謂君王若問妾顏色莫道不如  
宮裏時者也時年十七

五年己巳

有病中作詩是歲初置中和節集有中和節頌未  
及第時所作而序云臣某忝就賓貢之列則未必  
作於今年也

六年庚午

七年辛未

八年壬申

九年癸酉

十年甲戌

五月襄州府君卒於襄陽官舍府君自徐徙佐衢  
又徙襄公有遊襄陽懷孟浩然詩或是隨侍時作

十一年乙亥

十二年丙子

十三年丁丑

十四年戊寅

十五年己卯

公兄幼文為浮梁主簿留家於北公實從行有將之饒州江浦夜泊詩云身病向鄱陽家負寄徐州當作於此時是歲舉進士於宣州試射中正鵠賦窓中列遠岫詩公預薦送有傷遠行賦云分微祿以歸養自鄱陽而歸洛陽又云今我來兮秋風其涼蓋公既被薦乃歸省而其家當復自徐徙寓洛也

十六年庚辰

二月十四日中書舍人高郢下第四人及第試性習相近遠賦玉水記方流詩撫言云携謁校書郎李逢吉初不為意及覽賦頭云下自人上達君咸德以慎立而性由習兮大奇之元稹為集序云貞元末進士尚馳競高郢始用經藝為進退樂天一舉擢上第明年拔萃甲科由是性習相近遠求玄珠斬白蛇等賦及百道判新進士競相傳於京師

矣撫言又云時年二十七有詩曰慈恩塔下題名  
處十七人中最少年按舊史貞元十四年始以進  
士試禮部擢甲科公生壬子至戊寅恰二十七歲  
與撫言合今以集考之實不然省試賦既明著歲  
月而箴言序云十五年天子命勃海公領禮部貢  
舉事明年春一上登第又送使權序云十五年  
秋予始知進士與侯生俱為宣城守所貢明年春  
予中春官第則其非十四年審矣蓋公與元九書  
自言年二十七方從鄉試集序因之撫言之誤殆

由此然書但云從鄉試兩不云及第也李璿舊譜  
云樂天年二十九猶未第故有詩云此生知負少  
年春不展愁眉欲三十時真元十五年也明年始  
登第按十五年公方二十八其曰欲三十者大約  
言之便以為二十九亦誤矣及第後有留別同年  
詩云及第未為貴拜親方始榮又有憶舊山與同  
年賀坐主拜太常終日宴鄭家亭等詩有哀二良  
民為陸長源鄭通誠作也序云十五年隴西薨浹  
辰而師亂十六年夏南陽薨翌日而難作隴西董

晉南陽張建封也汴徐之變陸鄭皆戎倖死焉

十七年辛巳

祭符離六兄文云去年春居易南遊兄亦東適黔  
歛之間欣然一覲又在宣州祭烏江十五兄文云  
及兄辭滿淮南薄遊江東居易亦以行邁忽逆旅  
而逢蓋公及第後即遊江南復至宣城有叙德書  
情四十韻上宣歙崔中丞云幸穿楊遠葉謬折桂  
高枝又云磨鉛重剗割策蹇再奔馳相馬須憐瘦  
呼鷹正及饑當是此年所作詩意似欲求辟舉者

崔中丞名衍

十八年壬午

有詩云何況鏡中年又逼三十二時年三十一也  
舊譜以為校書時作非是

十九年癸未

以拔萃選登科時鄭珣瑜為吏部李商隱撰公墓  
碑云前進士避祖諱選書判拔萃蓋公祖名鏗與  
宏同音言所以不應宏辭也摭言云白公試宏詞  
賦考落以賦有不知我者謂我斬白蛇知我者謂



我斬白帝也登科之人賦皆無聞白公之賦傳於天下按公未嘗應宏詞此賦或是行卷所作據言誤也始仕為校書郎集有代書寄微之百韻首云憶在貞元歲初登典校司身名同日授心事一言知注云貞元中與微之同登科俱授校書始相識公及第於是四年年三十二矣歲有養竹記許昌令壁記及記盡

二十年甲申

汎渭賦序云右丞相高公之掌貢舉也予以鄉貢

進士舉及第左丞相鄭公之領選部也予以書拔萃判選登科十九年天子並命二公對掌鈞軸明年春予為校書郎始徙家秦中卜居於渭上蓋公未仕時家多在徐至是始居秦又有八漸偈二月在東都作當是迎家時也又燕子樓詩序云予為校書郎時遊徐泗間張尚書宴予酒酣出眇眇以佐歡歡甚予因贈詩云醉嬌勝不得風裊牡丹花意亦在此年燕子樓事世傳為張建封按建封死在貞元十六年且其官為司空非尚書也尚書乃

其子惜麗情集誤以為建封爾此事細事亦可以  
正千載傳聞之謬

順宗永貞元年乙酉

有感時詩云不覺明鏡中忽然三十二勿言身未  
老冉冉行將至

憲宗元和元年丙戌

罷校書郎四月應材識兼茂明於體用科入第四  
等是時順宗未葬以制舉人皆先朝所召命宰相監  
試元稹入第三等策林序云與微之俱應制舉閉

戶累月揣摩當代之事造成策目七十五門微之  
首登科予次焉授盩厔尉代書百韻詩云東垣君  
諫爭西邑我驅馳謂微之拜拾遺也權攝昭應早  
秋書事亦云丹殿子司諫赤縣我徒勞墓碑云以  
對策語切不得為諫官然第四等自當入赤尉謂  
語切不得入第三等乃可也有北樓望山醉中歸  
盩厔等語長恨歌

二年丁亥

有曲江早秋詩云我年三十六冉冉昏復旦墓碑

白雲先生集卷之三十六  
八十一  
云試進士取蕭瀚為第一事畢帖集賢校理月中  
由右銀臺召入翰林院試文明日以所試制加涇  
原段佑遂為學士時十一月也入院後有寄題藍  
屋雙松詩云忽奉宣室召徵為文苑臣舊譜以為  
與哥舒大詩不知何據是歲元稹母鄭氏死公為  
墓銘又有祭楊氏夫人文云維私之眷每深公夷  
也公夫人弘農郡君於虞鄉汝士為從兄弟  
三年戊子

四月二十八日授左拾遺有謝官狀與學士崔群

同進群時遷庫部員外郎五月有初授拾遺獻書  
舊譜云二年上書授拾遺又一年年三十七公時  
在諫省命寓直集賢殿月中召為學士按公二年  
自校理入翰林明年為諫官既拜乃上書不知譜  
所云何為乖誤若此有論制科人狀時牛僧孺皇  
甫湜李宗閔對策切直宰相李吉甫泣訴於上考  
官常貫之等皆坐貶故公極論之公時亦為考覆  
官唐朋黨之禍蓋始此而公與李德裕不咸亦始  
此又有論王鐸除官裴均進奉等狀

四年巳丑

有賀雨雪自去冬旱至春始得雨有德宗賢妃常氏墓誌有論魏徵舊宅狀論吐突承瓘職名狀有海圖屏風詩時方討王承宗公意不然故僭臣黿以風是歲生女曰金鑾

五年庚寅

寒食詩云忽因時節驚年幾四十如今欠一年有金鑾女晬日詩有論元稹左降狀請罷恒州兵二狀四月求京兆府判司得士曹參軍有謝官狀公

在諫省數言事忤憲宗意其論吐突承瓘尤不悅至有小子無禮之語賴李絳救解及當改官喻崔群使求自便又俾中人梁守謙宣旨於是有陳情狀蓋亦承上意爾舊譜謂在翰苑久不遷故求補外者非也有初除戶曹喜而言志詩未幾退居渭上有寄禮部崔侍郎翰林錢舍人一百韻云五年同晝夜一別似參商自二年為學士至此五年崔謂崔群嘗同狀謝官故又云共詞加寵命合表謝恩光也又有適意詩云三年作諫官復多尸素羞

一朝歸渭上泛如不繫舟又隱几詩云行年三十  
九歲暮日斜時又歸田詩云三十為近臣腰間鳴  
佩玉四十為野夫田中學鋤穀蓋自小諫為戶曹  
但解諫職而已至是則併翰苑皆解去是必移疾  
求退而史失載爾但集有拜裴均李絳張弘靖武  
元衡常貫之五相制考裴均相在元和三年公正  
居翰苑絳以六年相元衡八年弘靖貫之九年皆  
當公退閑憂居之日此又不可曉也是歲金鑾女  
死有詩云衰病四十身嬌癡三歲女又云病未絕

十日養得已三年

六年辛卯

有沐浴詩云自問今年幾春秋四十初又栽松詩  
云如何過四十種此數寸枝又白髮詩云况今我  
四十春雪詩云元和歲在卯六年春二月此即韓  
愈集所謂辛卯年雪也四月五日太夫人陳氏卒  
始鞏縣府君寔新鄭襄州府君寔襄陽至是皆遷  
護於下邳以十一月八日襄事而陳夫人祔焉有  
白氏事狀二道

七年壬辰

有秋日詩云下有獨立人年來四十一

八年癸巳

二月有陳府君夫人白氏及弟金剛奴墓誌夫人公之祖姑且外祖母也金剛奴公之幼弟公既卜塋祖禰至是亦遷祔焉又有祭金剛奴文是歲除喪九月有記異冬有村居苦寒詩

九年甲午

有重到華陽舊居詩云若為重入華陽院病髮愁

心四十三華陽觀公應制舉時所居也有遊悟真寺詩云元和九年秋八月月上弦冬除右贊善大夫有誦盧秘書早朝寄李二十助教詩舊譜云自渭南丁憂至十年除喪為贊善按丁憂在六年八年除喪又二年乃拜官耳

十年乙未

有贈杓直詩云巳年四十四又為五品官杓直李建也醉中却寄元九詩云蒲池村裏匆匆別灑水橋邊兀兀回時微之量移通判司馬三月三十日

與公別於灃上見十四年夷陵相遇詩序又是冬  
在江州與元九書亦云今年春遊城南時與足下  
馬上相戲各誦新艷小律又云言未終而足下左  
轉不數月而僕又繼行微之自江陵移通判即今  
達州也曷不自江陵徑入蜀豈嘗追赴京師而後  
改授乎有白牡丹詩云應似東宮白贊善被人還  
喚作朝官六月盜殺宰相武元衡公首上疏請急  
捕賊以雪國恥宰相以非諫職言事惡之會有惡  
公者言其母看花墮井死而作賞花及新井詩貶

江州刺史中書舍人王涯言其新犯不可復理郡  
又改司馬宰相常貫之張弘靖也舊譜併及裴度  
非是度方為中丞亦遇盜不死既愈迺相耳新井  
之事世莫知其實史氏亦不辯其有無獨高彥休  
闕史言之甚詳公母有心疾因悍妬得之及婆家  
苦貧公與弟不獲安居常索米丐衣於鄰郡邑母  
晝夜念之病益甚公隨計宣州母因病憤發狂以  
蒂刀自剄人救之得免後徧訪醫藥或發或瘳常  
侍二壯婢厚給衣食俾扶衛之一旦稍怠斃於坎

并時裴晉公為三省本廳對客京兆府申堂狀至  
四坐驚愕薛給事存誠曰其所居與白隣聞其母  
又苦心疾叫呼往往達於隣里坐客意稍釋他日  
晉公獨見夕拜謂曰前時衆中之言可謂存朝廷  
大體矣夕拜正色曰言其實也非大體也由是晉  
公信其事後除河南尹刑部侍郎皆晉公所擬凡  
曰墜井必恚恨也墮獲也凡曰看花必怡暢也閑  
適也安有怡暢閑適之際遽致顛沛廢墜之事樂  
天長於情無一春無詠花之什因欲黻藻其罪又

驗新井篇是尉蓋屋時作隔官三政不同時矣彥  
休所記大略如此聞之東都聖善寺老僧僧故佛  
兒和尚弟子也今考集中亦無所謂新井詩者意  
其刪去然則公母死以心疾固人倫之大不幸而  
傳致詩篇以成訛謗則儉士媚嫉者為之也故刪  
述彥休之語以告來者赴貶所  
有初出藍田過望  
秦嶺發商州等詩再到襄陽有訪問舊居詩宿鄂  
州有夜聞歌者詩初到江州有詩云樹木凋疎山  
雨後又江樓聞砧詩云江人授衣晚十月始聞砧



當是秋末冬初始到也有謫居詩云面瘦頭班四  
十四遠謫江州為郡吏臘月有與元九書舊史本  
傳全載

十一年丙申

二月三十日有送春歸詩秋送客湓浦有琵琶引  
又有始遊廬山詩八月二十日夢微之詩四十五  
詩云或擬廬山下來春結草堂有與揚虞卿書答  
崔侍郎書云自到潯陽或已周歲

十二年丁酉

草堂成三月二十七日始居記有之有祭匡山廬  
山神文有潯陽春詩云四十六時三月盡寫真詩  
云我昔三十六寫貌在丹青我今四十六衰頓在  
江城四月有遊大林寺序閏五月公兄幼文卒有  
祭浮梁大兄文幼文為浮梁主簿在貞元十五年  
今二十年矣而以舊官終未識中間何以不調也  
十三年戊戌

七月八日有司馬廳壁記云予佐是郡行四年矣  
有浩歌行云不覺身年四十七十二月二十日除

忠州刺史有荷聖澤及謝崔相公初著刺史緋詩  
十四年巳亥

春發江州有別草堂及潯陽宴別等詩三月十一  
日至夷陵遇微之停舟三宿有詩有三遊洞序時  
微之自通州移號州長史而公弟知退同行三人  
始游故目為三遊洞知退名行簡二十八日到忠  
州有謝上表有登東樓寄楊萬州及西樓夜東樓  
晚郡齋即事等詩州有木蓮花命道士母丘元志  
寫為圖作二絕句末云天教拋擲在深山傳於都

下除夜有詩云明朝四十九

十五年庚子

初春有東坡種花詩二月有郡中春燕詩寒食夜  
詩云四十九年身老日一百五夜月明天是歲正  
月二十八日憲宗崩有酬李相公詩云涕淚滿襟  
君莫怪甘泉侍從最多時時初聞國哀也夏有荔  
枝圖序冬召為司門員外郎有初脫刺史緋別東  
坡發白狗黃牛峽等詩十二月二十八日除主客  
郎中知制誥

穆宗長慶元年辛丑

正月四日有舉楊嗣復自代狀三月與中書舍人王起覆試錢徽下及第人有論事宜狀時以鄭郎等十四人謂之子弟本當在選中宰相段文昌學士李紳以囑托不行元稹以私憾共唱其事內出孤竹管賦題重試不能成文徽等皆坐貶公意大抵欲從寬厚也李建死公為墓碑謂之善人碑又有同元稹祭杓直文十月為中書舍人有新昌新居書事云冒寵已三遷歸朝始二年三遷謂司門

主客中舍也是歲公弟行簡授拾遺後弟敏中及第皆有詩

二年壬寅

正月有論行營事宜狀七月十日有曲江感秋詩云元和二年秋我年三十七長慶二年秋我年五十一中間十四年六年居譴黜是月除杭州刺史舊史云時河朔復亂數上疏論其事天子不能用遂求外任蓋穆宗荒縱宰相王播蕭俛杜元穎崔植等皆齷齪無遠略宜公之不樂居朝也墓碑云

貶杭州抗江南大藩不得言貶有初罷中書舍人  
詩時汴軍亂遂李愿汴路不通故由襄漢赴任有  
路次藍溪題內鄉縣及經商山鄧州漢江重到江  
州等詩十月一日到任有謝上表有初領郡政衙  
退等詩語林云替嚴員外休復休復有時名公喜  
為之代

三年癸卯

有立春後五日等詩又二月五日花下忙云二月  
五日花如雪五十二人頭似霜七月有祈泉亭神

文八月有祭龍文禱仇王神文冷泉亭記九月有  
遊恩德寺泉洞詩是時元稹自同州為浙東有喜  
為鄰郡先寄微之詩過杭有席上及留別贈答詩  
既至越微之有夸州宅詩所謂謫居猶得小蓬萊  
者公答之云知君暗數江南郡除却錢塘揔不如  
自是兩郡常以詩筒往來故有詩云為向兩州郵  
吏道莫辭來往遞詩筒舊譜謂元九已在越者非  
也除夜有寄微之詩六月朝半百又加三

四年甲辰

三月有錢塘湖石記五年有祭浙江文是月除右庶子有除官去未間又三年為刺史詩留題靈隱天竺留贈微之等詩至洛求分司有寄牛相公及分司詩始卜居履道坊得故散騎常侍楊憑宅有卜居詩云遂就無塵坊仍求有水宅未請中庶祿且脫雙驂易注云買宅價不足以兩馬償之又有移家詩云移家入新宅罷郡有餘資又有履道新居二十韻蓋公平生從仕至是始有俸餘於是定居于洛以為終焉之計唐語林云公罷抗俸多留

官庫繼守者公用不足則假而復填如是五十餘年及黃巢至郡文籍多焚其俸乃亡公自言罷郡有餘資而猶有寄留官庫者豈亦如今世有事例而法不應得者乎公宅地方十七畝屋室三之一水五之一竹九之一而島樹橋道間之池上篇序言之詳矣至後唐為普明禪院有秦王從榮所施大字經藏及馮公集寶藏中洛人但曰大字寺其園張氏得其半為會隱園水竹尚在寺中有公石刻甚多見宋敏求河南志李格非洛陽名園記其

南鄰即崔家池故有題新居寄宣州崔相公詩崔相群也河南志於履道坊不載群宅而云今不知所在公之居猶可識者不獨以名重亦以有水竹且為佛廬故也

敬宗寶曆元年乙巳

三月四日除蘇州刺史二十九日發東都有別洛城東花詩和汴州令狐相公答劉和州賈常州寄微之等詩五月五日到任有謝表七月有吳郡詩石記九日有詩云前年九日餘杭郡呼賓命宴清

白堂去年九日到東洛今年九日來吳鄉有赴洞庭及棟貢橘詩蓋以貢橘為名遊太湖也或者唐守臣修貢皆當躬親如湖常貢茶故事那有寄微之詩云五宿澄波皓月中有霓裳羽衣歌云玲瓏空候謝好第陳寵感粟沈平生笙清脆管纖纖手教得霓裳一曲成末云李娟張態君莫嫌六擬隨宜且教取玲瓏以下杭妓名娟態蘇妓名唐語林云官妓高玲瓏謝好好巧於應對善歌舞居易在杭樂於蘇詩有使君全未厭錢塘之句張君房勝

說云高玲瓏餘杭歌者樂天作郡日賦歌與之云  
罷胡琴掩秦瑟玲瓏再拜歌初畢末云玲瓏玲瓏  
柰老何使我歌了汝更歌元微之在越厚幣邀至  
月餘使盡歌所唱之曲作詩送行兼寄樂天云休  
遣玲瓏唱我詞我詞多是送君詩冬有西樓喜雪  
夜宴詩京兆元少尹文集序

二年丙午

歲日家宴詩云歲盡復推藍尾酒春盤先占膠牙  
餠正月三日閑行詩云赤欄三百六十橋花前款

云前歲花前五十二今歲花前五十五有百日假  
滿詩蓋欲移病歸洛故也劉禹錫有白太守行云  
聞有白太守拋官歸舊谿公答云昨乞百日告起  
吟五篇詩去年到郡時麥穗黃離離今年去郡日  
稻花白霏霏舊譜云劉與公為代非也夢得時在  
和州歲暮罷歸洛與公相遇於揚楚間其為蘇州  
乃在太和六年齊雲晚望詩云欲辭南國去重上  
北城看九月全無熱西風亦未寒河亭望詩郡靜  
官初罷鄉遙信未回明朝是重九誰勸菊花盃是

白雲天女集卷之三十一  
九月猶在郡公之去蘇蓋在冬秋之交有自問行  
何遲詩除日有答夢得同發楚州詩是冬第行簡  
死

文宗大和元年丁未

宿滎陽詩云生長在滎陽少長辭鄉曲去時十一  
二今年五十六公生於新鄭自蘇還道過之初到  
洛陽有閑遊詩三月召為秘書監有初除賜金紫  
詩舊譜云祕丞大誤有祕書省後廳詩十月有三  
教論衡文宗誕日與僧惟應道士趙常盈鄰德殿

講論也

二年戊申

正月除刑部侍郎有文集後序云二年秋余春秋  
五十有七是歲大有年有詔賜百官出城觀稼詩  
和微之我年五十七三首又和除夜詩云君提七  
郡藉我按三尺書蓋微之在越凡七年除夜知退  
大祥有退文

三年巳酉

春以病免官除太子賓客分司有喜除賓客詩將



至東都有寄令狐留守詩云惜逢金谷三春盡蓋以春暮至洛也歸履道宅詩云今日是歸長自是迄公薨凡十八年在洛終不渝長歸之語舊史云太和後宗聞德裕朋黨事起穎士虞卿與宗聞善居易妻穎士從父妹也居易懼以黨人見斥乃求置身散地凡所居官未嘗終秩率以病免識者多之有劉白唱和集解有偶作詩云為三品官年已五十八夏有祭常相公文處厚也有池上篇是冬與元稹各生子有賀微之詩又有自嘲詩云五

十八翁方有後靜思堪喜亦堪嗟又阿崔詩云豈料鬢成雪方看掌弄珠

四年庚戌

有三月三十日詩云半百過九年艷陽殘一日有同李翱祭李司徒文李絳也是歲遇害於興元十月除河南尹有醉中除尹敕到詩有除夜詩云火銷燈盡天明後便是平頭六十八

五年辛亥

有六十拜河南尹詩不准擬身年六十詩府中夜

賞詩阿崔年三歲死有哭崔兒詩報微之晦叔及  
酬夢得詩七月元稹薨有哭微之詩十月有祭文  
六年壬子

春有贈分司諸公詩寒食宴遊贈馮李二少尹詩  
府酒五絕夏有沃州禪院記六月有薦常晏李楚  
狀秋七月有元稹墓誌八月一日有修香山寺記  
寺在龍門山後魏熙平元年建公自為庶子賓客  
分司數往遊焉慨然有葺完之願及是為微之誌  
墓潤筆之直六七十萬義不受以施此寺開成五

年又為作經藏蓋嘗自稱香山居士云康駢劇談  
錄曰盧簡辭遊伊水別墅方冬霰雪微下忽有蓑  
笠牽蓬艇舫有白衣與衲僧同坐舫後以小竈安  
桐甑而炊烹魚煮茗流吟嘯使人問之乃白傳  
同佛光往香山也冬劉禹錫除蘇州過洛留十五  
日朝觴夕詠頗極平生之歡各賦數篇視草而別  
崔群薨有祭崔文有憶舊遊詩寄劉蘇州有贈崔  
常侍晦叔詩十二月四日有答崔賓客詩云今歲  
日餘二十六來歲年登六十二又有二十三日呈

晦叔云案頭曆日雖未盡向後惟殘六七行

七年癸丑

元日勸酒詩云三盃藍尾酒一椽膠牙餽此對嘗  
再用之又云夢得君知否俱過本命年公與夢得  
皆壬子生也有早春醉吟詩寄太原令狐公及劉  
蘇州又醉送李二十常侍赴鎮浙東詩李紳也公  
嘗有詩云悶勸迂辛酒閑吟短李詩李自壽陽公  
司浦至洛而刺越有春題府聽詩云潦倒三川守  
因循涉四年四月罷河南尹歸履道舊第有解印

出公府詩五首及罷府歸舊居再授賓客分司等  
詩七月崔玄亮卒有哭晦叔詩又有微之教詩晦  
叔相繼長逝歸然自傷因成二絕劉蘇州寄釀酒  
糯米李常侍寄楊柳枝無衫有詩謝之

八年甲寅

有早春憶蘇州寄夢得詩有感春詩云心情多少  
在六十二三人寒食日有翫半開花詩贈皇甫郎  
中有家釀新熟詩六十三翁頭雪白假如醒醺欲  
何為三月裴度為東都留守有侍中晉公欲到東

洛先蒙書問期宿龍門詩七月有洛詩序云自三年春至八年夏在洛凡五周歲作詩四百三十六首是歲有溧水令白君墓誌銘府君名季康敏中之父至今溧水城隍神相傳為白君也

九年乙卯

有覽鏡喜老詩云行年六十四安得不衰老夏有崔晦叔墓誌銘有東林寺文集記集凡六十卷九月除同州刺史不拜有詠懷詩十月改授太子少傅分司有詩云承華東署三少務履道西池七過

春於是劉禹錫自汝州移同州實與公為代有喜見劉同知詩劉集亦有訓公詩公舊托松心契新交竹使符也十一月有詠史詩云彼為薤醢机上肉我作鸞皇天外飛又有二十日獨遊香山感事詩云當君白首同歸日是我青山獨往時時新有甘露之禍初江州之貶王涯有力焉說者因是謂公幸之惟東坡蘇公云樂天豈幸人之禍者哉蓋悲之也以愚觀之其悲涯輩之禍而幸已之不與者乎鸞皇蓋自况也公又嘗有詩云今日憐君嶺

南去當時笑我洛中來未知為何人作六此意也  
開成元年丙辰

有春遊詩云我年六十五走若下坡輪有春盡日  
天津橋醉吟詩呈李尹時李紳自分司新除尹閏  
五月有聖善寺文集記凡六十五卷秋劉禹錫分  
司有喜夢白馮翊歸洛詩十月有皇甫鏞墓誌銘  
是歲楊慶卿死於虔州有哭師臯詩揚汝士授東  
川有代妻戲兄嫂詩

二年丁巳

春有感事詩云無憂六十六年春又有六十六詩  
云五十八歸來今年六十六又云六十六欠四歲此  
生何足論有齒落辭三月三日尹李待價啓留守  
輩侍中修禊合宴于舟中有詩十二韻待價李珣  
也有蘇州南禪寺藏記有聞新蟬贈夢得詩五月  
裴度尹太原牛僧孺為留守有同夢得牛相初到  
小飲見貽詩

三年戊午

春有櫻桃花下有感而作詩有醉吟先生傳北夢

瑣言云白公與元相友善集有詩云相看掩淚俱  
無語別有傷心事豈知想得咸陽原上樹已抽三  
丈白楊枝洎自撰墓誌云與彭城劉夢得為詩友  
不言元公時人疑其隙終也按此非墓誌語乃醉  
吟傳中語時元之亡久矣其言與僧如滿為空門  
友常楚為山水友皇甫朗之為酒友皆一時是在  
人則其為詩友自不應復及死者又嘗為劉白唱  
和集序且為劉書云微之先我去矣詩敵之勑者  
非夢得而誰此尤可謂公與元同升科第俱負直

聲中歲復俱蹇連睨而元撓有病入新正強起迎  
春寄思黯及病後寒食等詩三月三十日有燕罷  
感事吟詩云病與樂天相伴住春隨樊子一時歸  
按不能忘情吟序云妓有樊素者年二十餘綽綽  
有歌舞態善唱楊柳曲人多以曲名之其辭曰素  
事主十年凡三千有六百日公年五十八自刑部  
侍郎分司歸洛至六十八而得疾於是十年矣當  
是初歸洛時得之公嘗有楊柳枝詞八首又有楊  
柳枝二十韻自注云楊柳枝洛下新聲也洛之小

妓有善歌者詞章韻音聽可動人故賦之本事集云白尚書姬人樊素善歌小蠻善舞嘗為詩云櫻桃樊素口楊柳小蠻腰白公年邁而小蠻方豐艷因為楊柳枝以寄意曰一樹春風萬萬枝嫩於金色軟於絲永豐坊裏東南角盡日無言屬阿誰如本事集之說則樊素小蠻為二人以集考之不見此二句詩亦無所謂小蠻者而柳枝即樊素也舊譜引公詩兩枝楊柳小樓中嬌柳多年伴醉翁兩枝楊柳必非一人又有九日代羅樊二妓招舒著

作云羅敷歛雙袂樊姬獻一盃意所謂兩枝楊柳者然皆臆說未必然也又按劉禹錫有寄樊詩云終須買取名春草又憶春草詩云河南大尹頻出難又得池塘十步看府門閉即速化得罪清議公獨終始如一二人賢否固不可槩論而其交情死生不渝觀香山寺記尚欲結他生緣風誼之美可厲薄俗掩淚傷心之句旨意甚哀而或者臆度疑似乃有隙終之論小人之不樂成人之不美如是哉有題河南內廳詩云盃嘗七尹酒蓋自罷河南

六年換七尹酒味皆不同七尹者嚴休復王質鄭  
澣李紳李珣裴潏常長也除夜有詩云七十期漸  
近萬緣心已忘

四年己未

有四年春詩云又入開成第四春二月有蘇州南  
禪院集記凡六十七卷十月旦得風痺疾有病中  
詩十首并序鬻駱馬別柳枝詩在焉別詩云明日  
放歸歸去後世間應不要春風而又有不能忘情  
吟云路反廢素反閨又云素兮素兮為我歌楊柳

枝與爾歸醉鄉去來按劉禹錫和公詩云春盡絮  
飛留不得隨風好去落誰家公又戲荅云柳老春  
深日又斜任他飛向別人家他日又有春隨樊子  
一時歸之句則是柳枝竟去也意其初疾欲放而  
復留至明年乃竟去耳有白蘋洲五亭記稱十月  
十五日則病後所作也

五年庚申

後滿街月幾處遊人草頭歌則春草似是府妓又  
公喜見劉同州詩云應須為春草五馬立踟躕夢



得荅云今朝停五馬不是為羅敷注云前章所言  
春草白君之舞妓也然則春草與柳枝似各是一  
人偶同姓樊爾謾詳及之資雅話公又嘗有詩云  
菱角執笙簧谷兒抹琵琶紅綃信手舞紫綃隨意  
歌注云菱谷紅紫皆小獲名也是秋有病後獨宿  
香山二絕云更過今年年七十十一月有香山路  
中集記凡十卷

武宗會昌元年辛酉

春有病後喜過劉家等五絕又偶吟呈夢得云且

喜開年滿七旬為李紳作家廟碑云開成會昌之  
際當在此時有百日假滿少傅官停自喜言懷詩  
除刑部尚書致仕時李德裕初用事也有官俸初  
罷諭親故詩戲誚牛相呈諸寮友詩與夢得同致  
仕裴賓客王尚書飲詩云四箇老人三百歲有逸  
老詩云我初五十八息老雖非早一閑十三年所  
得亦不少皤然七十翁亦足稱壽考是歲李程為  
留守過公池上泛舟話及翰林舊事公有詩云同  
時六學士五相一漁翁五相謂李逢吉裴均崔群

及程也與公皆元和學士舊譜以為李逢吉非是  
考翰林記逢吉未嘗為學士言河南志其為留守  
乃大和中也

二年壬戌

有喜入新年自詠云大曆年中騎竹馬幾人得見  
會昌春有宿府中水堂贈盧尹中丞詩云從我到  
君十一尹相看自置府來無前已見七尹外有高  
銖孫簡盧貞弁公為十一人有香山寺寫真詩三  
月五日齋素畢開素有贈妻弘農郡君詩有達哉

樂天行秋劉禹錫卒有哭夢得詩又有感舊詩為  
李杓直元微之崔晦叔及夢得作皆執友也有送  
敏中為戶部員外郎詩云前鴻後鴈行相續相去  
迢迢二十年注云長慶初為主客員外郎到今二  
十年歲暮聞盧尹夜宴以詩戲之為來日張本云  
府中歡笑勝尋常明朝強出須謀藥

三年癸亥

送王使君赴蘇州詩云一別蘇州十八載公以寶  
曆丙午去蘇於今十八矣

四年甲子

有遊趙村杏花詩云七十三人難再到今春來是  
別花來有問諸親友詩云七十人難到過三更較  
難有開龍門八節灘九硝詩云七十三翁旦暮身  
誓將此路作通津

五年乙丑

有齋居春夕感事遣懷詩云風光拋得也七十四  
年春三月二十一日與前懷州司馬胡景衛尉卿  
言皎前右龍武軍長史鄭據慈州刺史劉貞侍御

史盧貞永州刺史張渾及公共七人為蔭會於履  
道宅詩云七人五百七十歲秘書監狄藍暮河南  
尹盧貞以年未七十雖預會而不及列故又稱九  
老會是會盖有兩盧貞也

本朝洛中九老會盖倣此而司馬公未七十預會  
亦用狄藍盧尹故事云

六年丙寅

有自詠示諸家屬詩云壽及七十五俸霑五十升  
有立春日人日詩又有詠春詩云自中風來三歷

閔廬尹和公永豐坊柳詩公亦和云定知天象今  
春後柳宿光中添兩星按本事集云宣宗聞唱題  
詞問永豐所在及何人所作因東使命取兩枝植  
於禁中宣宗以是歲三月即位藉曰於會昌為叔  
父且有宿憾然亦不應於授受危疑之際聞歌植  
柳如其急者盧貞為尹在四年七月或只是五  
年春武宗在位時事以本事集指為宣宗故記之  
於此八月公薨贈尚書左僕射有自為墓誌銘公  
卒之歲新史及墓碑所載皆同獨舊史云大中元

年年七十六非也當以墓碑為定公自喪阿崔終  
身無子墓誌云以姪孫阿新為後又云三姪曰咏  
道景回晦之世系表載公子景受以從子繼碑亦  
云大中三年景受自潁陽尉典治集覽書奉大夫  
人楊氏來京師命客取文刻碑按公會其姪而以  
姪孫為後既不可解而所謂阿新者即景受乎則  
昭穆為失次不然則治命終不用耶碑云十一月  
塋龍門而墓誌云塋于華州下邽祔先塋也則治  
命亦本不於龍門賈氏談錄云四方過者必奠卮

酒冢前方丈常成泥濘墓誌又云母請大常謚母  
建神道碑新史云敏中為相請謚曰文賈氏談錄  
云有司請賜謚上曰何不取醉吟先生墓表看卒  
不賜謚弟敏中奏立神道碑據此則但立碑而未  
嘗賜謚也新史當別有據新史又云宣宗以詩吊  
之今其詩見撫言略云綴玉聯珠三千首誰教冥  
路作詩仙舊譜云李德裕貶崖州公有詩三首其  
一云樂天嘗任蘇州日要勸須教用禮儀後世結  
成千萬恨這回果中白家詩六年四月德裕貶崖

而公之卒不記其月按此蓋未嘗見神道碑而此  
詩集中無有見於漁隱叢話謂攷之元和錄居易  
年長於德裕視德裕為晚進德裕為浙西觀察使  
居易刺蘇州德裕以使職自居不少假借居易不  
得已以軍禮見及其貶也故為詩云元和錄者世  
不見其書不知漁隱從何得之也德裕以四月罷  
相為江陵尹其自潮貶崖蓋在明年之冬公薨固  
已久矣審如詩意則為幸災快忿非青山獨往之  
比故穎濱蘇公力辯之以為刻核大甚樂天不至

此也蓋不待攷其年月而可知其偽矣况年月復甚明白舊譜何其不深歟耶要之小說所載自難盡信公與德裕本無深怨蓋自元和中其父吉甫為相而牛僧孺李宗閔對策切直吉甫泣訴於憲宗考官坐貶而公嘗上書救之李絳與吉甫不叶而公又與絳善其後牛李與德裕迭為相其黨亦迭為軒輊楊虞卿汝士與宗閔允厚號黨魁而公夫人虞卿從妹矣故德裕惡公武宗聞公名欲召以為相德裕言居易衰病其弟敏中文詞不減后

易且有器識遂以為翰林學士孫光憲北夢瑣言云劉禹錫大和中與德裕同在東都分司禹錫謁德裕曰曾得白居易文集否德裕曰累有相示未嘗一披今為吾子覽之既啓復卷曰吾於斯人不足久矣其文章精絕何必覽之但恐回吾之心其見抑也如此楊虞卿牛僧孺公昔密友也其不引翼義在於斯按唐朋黨之禍始於元和之初而極於大和開成會昌之際三十年間士大夫無賢不肖出此必入彼未有能自脫者權位逼軋福禍伏

何大則身死家滅小亦不免萬里拔荒獨公超然  
利害之外雖不登大位而能以名節始終惟其在  
朋黨之時不次於朋黨故也故元稹裴度之深仇  
也公雖厚於稹而亦親於晉公晉公在位公為丞  
郎李宗閔牛僧孺之死黨也公雖厚於僧孺而未  
嘗昵於宗閔僧孺當國公方自杭州求分司李紳  
德裕之至交也公雖惡於德裕而與紳唱酬往來  
情分極不薄公於交遊無所適莫可見於此矣然  
則公之論牛李自是舉諫爭之職而非以內私交

其師阜慕巢厚善自是篤烟婭之好而非以狗權  
勢公能信於裴度李紳而不能信於德裕何哉乎  
公之德量固非公垂之比而文饒之忌克又在公  
垂之上其進敏中以抑居易自以為得策及其失  
勢擠之而下石焉者乃其所謂有器識者也自古  
朋黨雖起於小人之傾危而成於小人之剛褊以  
文饒之才略號稱賢相而不免禍者其心未能休  
休於容政也然文饒雖惡公不過使之不為相而  
公亦卒無他禍詩云既...以保其身白公有

鳥鳴呼可不謂賢乎

